

有关郑观应及《盛世危言》史料一则

中国第一历史档案馆

郑观应（1842—1922年）广东香山县（今中山市）人，是中国近代史上起过重要作用和影响的资产阶级改良主义思想家。其著述颇丰，尤以1893年编定的《盛世危言》为其代表作。该书集中地反映了郑观应向西方学习、救国富强、追赶世界强国的进步思想和主张。现从馆藏军机处档案中选录有关史料一则，予以刊发，供研究参考。

—— 编者 吕 坚

江苏布政使邓华熙为进呈郑观应《盛世危言》一书并陈管见事奏折

光緒二十一年三月二十六日

头品顶戴。江苏布政使邓华熙跪奏，为时事艰难，亟宜补救，谨陈管见，敬录书籍进呈，吁恳乾断施行，建新猷以维积弱，恭折仰祈圣鉴事。

窃以求明医以愈疾，必无良药苦口之嫌；际穷久而思通，贵有易辙改弦之举。古来制治保邦，未有不因时制宜而能成长治久安之盛业者。溯自洋务肇兴，我朝廷宵旰忧劳，孜孜求治数十年，内外臣工讷无志虑忠纯，思深谋远。几经筹画，以图自强，而国势迄未能张，外侮迄未能御，岂才力真有未逮哉？毋亦封于故步而兴创鲜同心，昧于时宜而胶执多自误也。自海禁开而外夷麇集中华，目睹彼族之炮利船坚，所向无敌，何尝不规规仿效振作于前？是以建船坞，筑炮台，购铁甲之船，设制造之厂，所耗帑项何止数千万？然而马江之役，兵船灰烬，藩服终属于他人。今经倭奴蕞尔小邦，步武西法仅十余年，竟借无端之衅，强据我属，虔刘我边陲，攻夺我海军，侵及辽疆，所至披靡。以堂堂中土，竟示弱于三岛之区。此天下臣民所为疾首痛心而不胜其太息愤懣者。谓是由当事者之机宜坐失，固属咎无可辞。臣愚以为非仅一时一事之貽害，其所以召侮而致祸者由来渐矣！

夫泰西立国，具有本末，广学校以造人材，设议院以联众志，而又经营商务以足国用，讲求游历以知外情，力果心精，实事求是。夫然后恃其船械，攸往咸宜。今中华不揣其本而末是求，无学校之真，则学非所用，用非所学；无议院之设，则上下之情隔，粉饰之弊多。他如商务、技艺、教养、武备诸大端，彼所有者我所无，彼所长者我所短。习焉不察，遂至因循。际此势绌情见之秋，自无不思亡羊补牢之计。而臣犹以鳃鳃过虑者，诚恐习俗拘迂未化，或以用夷变夏为言，凡事畏难苟安，复蹈浅尝辄止之失，不思倭与我本同文之国，彼以能自得师而效著，我何难幡然变计以维新。

臣阅候选道郑观应所辑著《盛世危言》一书，于中西利弊透辟无遗，皆可施诸实事。前兵部尚书彭王麟称为时务切要之言。查该员游历诸邦，留意考究，其坚心刻苦，诚为可用之才。自以外患方殷，出其书以就正。臣见其语皆征实，说集众长，间有戆直之辞，莫非臆诚所发。至于推行次第，何后何先，在斟酌于当几，斯变通之尽利。谨抄录原书，恭呈睿览。当此君父焦劳图治，固食毛践土所欲效忠。伏惟圣人俯察迩言，虽葑菲弱莠，胥能上达。

谨陈管见，并录原书一函五册，随折恭进，伏乞皇上圣鉴训示。谨奏。

光緒二十一年四月十四日奉朱批：知道了。书留览。钦此。